

तीतुस

१ पौलुस केर ओर से जेके परमेश्वर केर चुनाल आदमीमान के उमान केर विश्वास में सहायता देवेक केर लागिन आउर हमार धर्म केर सच्चाई के सम्पूर्ण ज्ञान के समझाएक बुझाएक केर लागिन भेजाल जाहे; २ उसोउब के मोंय ऐसान ईकार लागिन करारथों कि परमेश्वर केर चुनाल मान के अनन्त जीवन केर आशारा करोक। परमेश्वर, जे केखनो झूठ नी बोलेला, अनादि काल से अनन्त जीवन केर वचन देईहे। ३ उचित समय में परमेश्वर अपन सुसमाचार के उपदेशमान केर द्वारा प्रकट करलक। ओहे सुसन्देश हमार उद्धारकर्ता परमेश्वर केर आज्ञा से मोके सौपाल जाएहे।

४ हमार समान विश्वास में मोर सच्च बेटा तीतुस के: हमार परमपिता परमेश्वर आउर उद्धारकर्ता मसीह यीशु केर ओर से अनुग्रह आउर शांति प्राप्त होक।

क्रेते में तीतुस केर काम

५ मोंय तोके क्रेते में ईकार लागिन छोईइ रहों कि हुवाँ जे कुछ अधूरा रई जाहे, तोयं उके ठीक-ठाक कईर देबे आउर मोर आदेश केर अनुसार हर नगर में बुजुर्गमान के नियुक्त करबे। ६ ओहे नियुक्ति सेखान कराल जाओक जेखान उमान निर्दोष होबाँए। एकझन पत्नी व्रती होक। उकार छौवामान विश्वासी होक आउर अनुशासनहीनता केर दोष उकार में न लगाएक जाए सकोक। तथा उमान भी निरकुश भी न होक। ७ निरीक्षक केर निर्दोष तथा कोनो भी बुराई से अछूत होवेक लगे। काहेकि जेके परमेश्वर केर काम सौपाल जाहे, उ अडियल, चिड़चिड़ा आउर दाखमधु पीएक में उकार रूचि नी होवेक लगे। उ झगड़ालू, नीच कमाई केर लोलुप नी होवेक लगे ८ लेकिन उ तो अतिथिमान के आवभगत करेक वाला, भलाई के चाहेक वाला, विवेकपूर्ण, धर्मी, भक्त तथा अपन में नियन्त्रण रखेक वाला होवेक लगे। ९ उ उ विश्वास करेक योग्य संदेश के दृढ़ता से धारण कईरके रहेक लगे जेकार उके शिक्षा देवाल जाएहे, ताकि उ आदमीमान के सदशिक्षा देईके उमान के प्रबोधित करुवाएक सकी। तथा जे ईकार विरोधी हेकाँए, उमान के खण्डन करेक पारी।

१० ईसोउब ईकार लागिन महत्वपूर्ण हेके काहेकि बहुत से आदमीमान विद्रोही होएके व्यर्थ केर बात बनाए बनाए के दोसरामान के भटकाएन। मोंय विशेष रूप

से यहूदी पृष्ठभूमि केर आदमीमान के उल्लेख करारथों। ११ उमान केर तो मुँख बन्द कईर देवेक लगे। काहेकि उमान जेसोउब बातमान के नी सिखाएक लगी, उसोउब के सिखाएके घर के घरमान से बिगाड़ाथाँए। बुरा रास्तमान से धन कमाएक केर लागिन हे उमान ऐसान करेना। १२ एकझन क्रेते केर निवासी अपन आदमीमान केर बारे में स्वयं कई हे, “क्रेते केर निवासीमान सोभे समय झूठ बोलेना, उमान जंगली पशु हेकाँए, उमान आलसी हेकाँए, पेटू हेकाँए।” १३ ई कथन सच हेके, ईकार लागिन उमान के जोर से डाँट-धामकाओ ताकि उमान के विश्वास पक्का होए सकी। १४ यहूदीमान केर पुरना वृत्तान्तमान में आउर उ आदमीमान केर आदेशमान में, जेमान सच्चाई से भटाईक जाहाँए, कियो ध्यान न देबा।

१५ पवित्र आदमीमान केर लागिन सोउब कुछ पवित्र हेके, किन्तु अशुद्ध आउर जेमान में विश्वास नैखे, उमान केर लागिन कोनो भी पवित्र नैखे। १६ उमान परमेश्वर के जानेक केर दवा करेना। किन्तु उमान केर काम दर्शाएला कि उमान उके जानेना कि नई। उमान घृणित आउर आज्ञा केर उल्लंघन करेक वाला हेकाँए। तथा कोनो भी अच्छा काम के करेक में उमान असमर्थ आहाँए।

सच्चा शिक्षा केर अनुसरण

१७ किन्तु तोयं सोभे समय ऐसान बातमान बोलबे जेसोउब सदशिक्षा केर अनुकूल हेके। १८ वृद्ध पुरुषमान के शिक्षा दे कि उमान शालीन आउर अपन में नियन्त्रण रखेक वाला बनोक। उमान गंभीर, विवेकी, प्रेम आउर विश्वास में दृढ़ आउर धिराजपूर्वक सहनशील होक।

१९ हे रकाम वृद्ध महिलामान के सिखाओ कि उमान पवित्र आदमीमान के योग्य उत्तम व्यवहार वाला बनोक। निन्दक न बनोक तथा बहुत अधिक दाखमधु पीएक वाली न होक। उमान अच्छा-अच्छा बातमान सिखाएक वाली बनोक २० ताकि युवतिमान के अपन-अपन छौवामान आउर पतिमान के प्रेम करेक केर शिक्षा देई सकोक। २१ जेकार से उमान संयमी, पवित्र, अपन-अपन घरमान के देखभाल करेक वाली, दयालु अपन पतिमान केर आज्ञा मानेक वाली बनोक जेकार से परमेश्वर केर वचन केर निन्दा न होक।

९ओहे रकाम जवानमान के सिखाते रह कि उमान संयमी बनोक। १०तोय अपन के हर बात में आदर्श बईनके देखाओ। तोर उपदेश शुद्ध आउर गम्भीर होवेक लगे। ११ऐसान सद्गणी केर प्रयोग कर, जेकार आलोचना न कराल जाए सकोक ताकि तोर विरोधी लज्जित होक काहेकि उमान केर टिन तोर विरोध में बुरा कहेक लागिन कोनो नी रही।

१२दासमान के सिखाओ कि उमान हर बात में अपन मालिकमान केर आज्ञा के पालन करोक। उमान के खुश करते रहोक। उलागिनट के बात न बोलोक। १३चोर चालाकी न करोक। लेकिन सम्पूर्ण विश्वसनीयता केर प्रदर्शन करोक। ताकि हमार उद्धारकर्ता परमेश्वर केर उपदेश केर हर रकाम से शोभा बढोक।

१४काहेकि परमेश्वर केर अनुग्रह सोउब मनुष्यमान केर उद्धार केर लागिन प्रकट होहे। १५ईकार से हमरे के शिक्षा मिलेला कि हमरे परमेश्वर विहीनता के नकाईर के आउर सांसारिक ईच्छामान के निषेध कईरके ऐसान जीवन जीबोई जे विवेकपूर्ण आच्छाई, भक्ति से भरपूर आउर पवित्र होई। आईज केर ई संसार में १६आशारा केर उ धन्य दिन केर प्रतीक्षा करते रहबोई जेखान हमार परम परमेश्वर आउर उद्धारकर्ता यीशु मसीह केर महिमा प्रकट होई। १७उ हमार लागिन अपन के देई देलाक। ताकि उ सोभे रकाम केर दुष्टतामान से हमरे के बचाए सकी आउर अपन चुनाल आदमीमान केर रूप में अपन लागिन हमरे के शुद्ध कईर लेई— हमरे, जेसोउब उत्तम काम करेक केर लागिन लालायित आही।

१८बातमान के पूरा अधिकार केर साथ कह आउर समझाते रह, उत्साहित करते रह आउर विरोधिमान के झिड़कते रह। ताकि केहो तोर अनसुनी न करेक सकोक।

जीवन केर उत्तम रीति

३ १आदमीमान के याईद दिलाते रह कि उमान राजामान आउर अधिकारिमान केर अधीन रहोक। उमान केर आज्ञा के पालन करोक। हर रकाम केर उत्तम काममान के करेक केर लागिन तैयार रहोक। २केकरो निन्दा न करोक। शांति-प्रिय आउर सज्जन बनोक। सोउब आदमीमान केर सागें अच्छा व्यवहार करोक।

३ईके मोंग्र ईकार लागिन बताथें काहेकि एक समय रहे, जेखान हमरे भी मूरख रही। आज्ञा केर उल्लंघन करत रही। भ्रम में पईइ जाए रही। तथा वासनामान एवं हर रकाम केर सुख-भोग केर दास बईन रही। हमरे दुष्टता आउर ईर्ष्या में अपन जीवन जीयात रही। हमरे

के आदमीमान घृणा करत रहाँए तथा हमरे भी परस्पर एक दोसरे के घृणा करत रही। ४किन्तु जेखान हमार उद्धारकर्ता परमेश्वर केर मानवता केर प्रति करुणा आउर प्रेम प्रकट होलाक ५उ हमार उद्धार करलक। ईठु हमार निर्दोष ठहराय जाएक केर लाई हमार कोनो धर्म केर काममान केर कारण नी होहे लेकिन उकार करुणा केर द्वारा होलाक। उ हमार रक्षा उ स्नान केर द्वारा करलक जेकार में हमरे फिर पैदा होवीला आउर पवित्र आतमा केर द्वारा नौतून बनाल जाईला। ६उ हमार में पवित्र आतमा के हमार उद्धारकर्ता यीशु मसीह केर द्वारा भरपूर उँडाईले। ७एखान परमेश्वर हमरे के अपन अनुग्रह केर द्वारा निर्दोष ठहराहे ताकि जेकार हमरे आशारा करत रही उ अनन्त जीवन केर उत्तराधिकार के पाए सकबोई।

८ई बात विश्वास करेक योग्य हेके आउर मोंग्र चाहोना कि तोय ईसोउब बातमान में डटाल रह ताकि उ जेमान परमेश्वर में विश्वास करेना, अच्छा काममान में हे लईग रहोक। ईसोउब बातमान आदमीमान केर लागिन उत्तम आउर हितकारी हेके।

९वंशावलि सम्बन्धी विवादमान, व्यवस्था सम्बन्धी झगड़ामान झमेलामान आउर मूर्खतापूर्ण मतभेदमान से बईच रह काहेकि उमान से कोनो लाभ नैखे, उसोउब व्यर्थ हेके। १०जे व्यक्ति फूट डालेला, उके एक या दुई बार चेतावनी देईके अलग होए जा। ११काहेकि तोय जानिसिला कि ऐसान व्यक्ति मार्ग से भटकाल जाहे आउर पाप कराथें। उ तो स्वयं अपन के दोषी ठहराहे।

याईद रखेक केर थोड़ा बातमान

१२मोंग्र तोहरे टिन जेखान अरतिमास या तुखिकुस के भेजबों होले मोर टिन निकुपुलिस आवेक केर भरपूर जतन करेबे काहेकि मोंग्र हुवाँए ठण्डा बिताएक केर निश्चय कईरों। १३वकील जेनास आउर अप्पुलोस के उमान केर यात्रा केर लागिन जे कुछ आवश्यक होई, उमान केर लागिन तोय भरपूर सहायता जुटाए देबे ताकि उमान के कोनो बात केर कोनो कमी न रहोक। १४हमार आदमीमान के भी भाल काममान में लईग रहेक सीखाएक लगे। उमान में से भी जेमान के अत्यधिक आवश्यकता होई, उसोउब के पूरा करबे ताकि उमान विफल न होओक।

१५जेमान मोर सागें आहाँए, उ सोउबकर तोके नमस्कार। हमार विश्वास केर कारण जे आदमीमान हमरे के प्रेम करेना, उमान के भी नमस्कार।

परमेश्वर केर अनुग्रह तोहरे सोउबकर सागें रहोक।